

參同直指

兰州古旧书店

光緒庚辰年春月

參同直指

海上翼化堂藏板

参同直指

兰州古旧书店影印发行
全国新华书店经销
中国科学院兰州冰川
冻土研究所通利公司印刷

1988年4月第一次印刷

定价：1.20元

參同契經文直指上篇

東漢魏伯陽真人著

棲雲山悟元子劉一明解

後學

蕭南浦重刊

上篇敘

以御政

乾剛坤柔配合相包陽稟陰受雄雌相須須以造化精氣
乃舒坎離冠首光映垂敷位冥難測不可畫圖聖人揆度
參序元基四者混沌徑入虛無六十卦周張布爲輿龍馬
就駕明君御時和則隨從路平不邪邪道險阻傾危國家

大道無聲無臭非色非空有何可言然無聲無臭中而
藏陰陽非色非空裏而含造化果若無言陰陽消息何
以知造化機密何由曉故古人云道本無言言以顯道
天不私道龍馬負圖出河泄露天機伏羲氏則之而畫
先天八卦又重而爲六十四卦降之文王又變出後天
八卦衍而爲後天六十四卦分而爲三百八十四爻而
又繫之以辭明吉凶之理宣聖十翼闡義文之義於是
先天後天之理詳明且備天地造化之道昭昭矣故易
之一書爲中國希賢希聖之理窟修道立德之根本儒

門之所遵者此書。道門之所則者此書。黃帝陰符。老子道德。其理其義皆與易理暗合。然諸聖奧語妙義。後世罕能測其端倪。難以窺其畔岸。卽有一二良材志士。總得一言半語。亦無下手處。伯陽仙翁老婆心多。推諸聖度世之心。準易道而發陰符道德之秘。千百比喻。曲盡其說。蓋欲人人成道。個個了真。後來丹經子書皆本參同而作。是以參同爲萬古丹經玉丹經之名。實本於此金丹之名。亦始於此。夫人秉天地陰陽五行之氣而生身。身中卽有此陰陽五行之氣。陰陽五行之德。氣屬命。

德屬性是性命乃天地陰陽五行之氣而成修性修命之學。離天地陰陽五行之道再無別術矣。易卽天地陰陽五行之道能明易道而聖道可知。故易道以乾坤爲首而敘卦。參同亦以乾坤爲首而敘道。是參同之理本於易理也。易以乾坤爲首者。乾者健也。取象爲天。天陽而至剛。剛主健。故曰乾剛。坤者順也。取象爲地。地陰而至柔。柔主順。故曰坤柔。乾坤定位。剛柔相包。乾陽之氣稟與坤陰之氣承受。一雌一雄相。行造化則陽之精陰之氣得以舒暢而生萬物矣。易以坎離爲中者。坎

外陰而內陽象月。離外陽而內陰象日。日月者天地之精魂。代天地而行造化。乃氣運之冠首。日照月臨。光映垂敷。四時行而萬物生長收藏。皆自然而然。天地剛柔之所以能舒精氣。日月來往之所以能垂光耀。還有個無形無象物事。在內運動其理至神至妙。難以測識。不可畫圖。故聖人揆度陰陽消息。參序其元本根基。以示其奧。四者混沌。徑入虛無者。易以乾坤爲體。坎離爲用。四者混沌。而歸於虛無一氣。一氣流行。陰而陽。陽而陰。陰陽交錯。始於屯蒙。終於既未。餘六十卦。陰陽迭運。張

布而爲輿。龍馬就駕。運轂正軸。以行造化。此易之大畧也。首出庶物之聖。乘六龍以御天。動靜隨時。一與易準。不敢稍有差錯。蓋易以陰陽和平爲本。御政者。觀天道。執天行。是謂能和。和則萬民隨從。王道坦坦。路平不邪矣。御政者。違天道。失天行。是謂不和。不和則上下不應。邪道險阻。傾危國家矣。比之修道者。以剛健柔順爲體。以剛柔中正爲用。剛柔合一。如乾坤之匹配。剛柔中正。如坎離之光垂。剛柔相當。健順混成。精氣充足。心君虛靈。渾然天理。心正而身可修矣。蓋治身治國一理也。心

正君正一道也。未有君不正而能御時。未有心不正而能全道。仙翁首以易理御政。提出爲綱領。特以性命之達一易道。修身之事如御政。不明易道者不能修性命。不明御政者不能修身心。易道御政皆以陰陽相和爲本。修持性命舍陰陽相和之道。其外再無二法矣。此節重在一和字。和則路平不邪。不和則邪道險阻。學者可不先知其和乎。後附一圖以備參考。

君子居其室。出其言善。則千里之外應之。謂萬乘之主。處九重之位。發號出令。順陰陽節。藏器俟時。勿違卦月。屯以子申。蒙用寅戌。餘六十卦。各自有日。聊陳兩象。未能究悉。立義設刑。當仁施德。逆之者凶。順之者吉。按時發令。至誠專密。謹候日辰。審察消息。纖芥不正。悔吝爲賊。二至改度。乖錯委曲。隆冬大暑。盛夏霜雪。二分縱橫。不應漏刻。水旱相伐。風雨不節。蝗蟲湧沸。羣異傍出。天見其怪。山崩地裂。孝子用心。感動皇極。近出己口。遠流殊域。或以招禍。或以致福。或興太平。或造兵革。四者之來。由乎胸臆。動靜有常。

奉其繩墨。四時順宜。與氣相得。剛柔斷矣。不相涉入。五行守界。不妄盈縮。

上節言陰陽相和而後可以有爲矣。但有陰陽必有生殺。生殺分明。陰陽相須。以之治國。則國可以治。以之修身。則身可以修。蓋修真之道。所以法天效地。一言一行。必須謹密。暗合天地造化。方能與天地合德。奪天地之氣。數爲我有。繫辭傳曰。君子居其室。出其言善。則千里之外應之。夫修辭立其誠。所以進德也。因其進德。所以言必誠。室者。人所不知。而已所獨知之地。居其室而能

慎其獨則靜觀密察言不妄出一出其言言必盡善言
善則有信有信則行無不當可以動天地感人物故千
里之外應之御政之主觀天道執天行發號出令必順
陰陽之節而不敢有違於天行者蓋以言行君子之樞
機樞機之發榮辱之主也修道者用剛用柔倣御政者
發號出令順陰陽節未有心不正而身不修性不盡而
命不立者何爲發號出令順陰陽節陽節所以生發
萬物陰節所以收斂萬物修道有進退之法當陽而用
陽當陰而用陰用陽者進也用陰者退也進退各有其

節。是謂天人合發。順陰陽而號令也。藏器俟時。勿違卦
月者。一年十二月。上六月屬陽。下六月屬陰。自子至巳
復臨泰大壯夬乾六陽卦統之。自午至亥。姤遯否觀剝
坤六陰卦統之。陰陽卦氣各行其時。十二月行六十卦。
共三百六十日。一日行一爻。共行三百六十爻。一月三
十日。行五卦共三十爻。自冬至後行起。始於屯蒙。終於
既未。如屯蒙二卦。屯乃坎震合卦。三三坎爲水。震爲雷。
雷在水中。陽動於陰中也。屯以子申者。坎在子爲水。水
生於申。旺於子。陽氣至子而升。陽用事也。蒙乃艮坎合

卦。三三艮爲山。坎爲水。水在山下。陽氣止於陰中也。蒙用寅戌者。艮在寅藏火。火生於寅。庫於戌。陽氣至戌而藏。陰用事也。屯主生陽。蒙主養陽。修丹之道。藏器於身。待時而用。當進陽而陰中返陽。以進火。如屯陽動陰中也。當陽足而陽中運陰以退火。如蒙陽止陰中也。餘六十卦。各自有日者。一月五卦。三百六十日。行六十卦。卽上節。六十卦周張布爲輿也。聊陳兩象。未能究悉者。舉此屯蒙兩卦。反正之象。其餘五十八卦。一反一正。各行卦氣。可以類推而知。不必究悉矣。六十四卦。只言六十

卦者。蓋造化之道。以乾坤爲體。以坎離爲用。六十卦皆
乾坤坎離四卦。一陰一陽。變化而生出者也。修道者。若
知此中消息。則明損益。知昏曉。以乾坤爲體。以坎離爲
用。一動一靜。而六十卦自然而然。不執卦象。自合卦象
也。立義設刑。當仁施德者。義剛主刑。仁柔主德。當剛而
剛。以義施刑。當柔而柔。以仁施德。設刑以去客氣。施德
以養正氣。義以成仁。仁以濟義。仁義並行。刑德兩用。大
丹始成。遵此者。則陰陽乖戾而凶。順此者。則陰陽調和
而吉。故必按節候。發令施爲。神明默運。志誠專密。防危